



15. december 2011

Inatsisartut suleriaasianni § 37 naapertorlugu Naalakkersuisunut apeqqut imaattoq matumuuna saqqummiuppara:

**Naalakkersuisunut Apeqqut:**

1. **Ilanngaaserisunik tamakkiisumik ikiaroonartunik ujarlertussanik pilersaaruteqartoqarpa sulisunik amerliliinissamik?**
2. **Imigassat aalakoornartortallit nunani allani angalareersimalluni nunatsinnut nammineq nassarlugit eqquteqqusaajunnaarnerisa kingorna ilanngaaserisut politiillu nakkutiginninnerat annertunerulersimava?**
3. **Ilanngaaserisut ukiut kingulliit marluk ingerlanerini ikaleriarsimappat?**
4. **Ikiaroonartulerinermik inatsimmik unioqqutitsisut maannakut pineqaatissinneqartarneranniit sakkortunerusumik pineqaatissiisoqartalernissaa Naalakkersuisut suliniutiginiarpaat?**
5. **2009,2010,2011-ilu ikiaroonartulerinermik inatsimmik unioqqutitsinerit qanoq amerlatigisimappat aningaasallu qanoq amerlatigisut arsaarinnissutigineqarsimappat?**

(Inatsisartuni ilaasorta, Kristian Jeremiassen Siumut)

**Tungavilersuut**

Nammineerlunga nuannaartorivakka Savalimmiormiut nunatsinnut sanilliullugit ikiaroonartumut akiuniarnerat annertunerusutut isikkoqarmat. Savalimmiut assersuutigivara nammineerlunga pingasoriarlunga tikittarsimavara, taamaalillunga takusinnaallugu nunatsinnut sanilliullugu tamatigut ilanngaaserisoqartuaannarnera pasinarsinnaasunillu tiguisarnerat.

Allaat isumaqalerpunga nunatsinni taama annikitsigisumik akiuniarneq allaanngitsoq ikiaroonartumut akuersinerusoq, naak ikiaroonartooq nunatsinni inertequtaagaluartoq.

Taamaammat apeqqutiginiarpa Ilanngaaserisunik tamakkiisumik ikiaroonartunik ujarlertussanik pilersaaruteqartoqarpa sulisunik amerliliinissamik? Tassami nunarput savalimmiunut sanilliullugu ajornanngippaseqaaq ikiaroonartumik eqqussiffigissallugu, qasseriarlungamitaava naammattoortarpara qallunaat nunaanniit tikikkaangama ilanngaaserisut politiinillu peqanngingajavittarnera.

Assersuutigilarami ippassaq Qallunaat Nunaanniit tikikkama politeeq ataaseq timmisartorsuarmit anillakkatta sissuertuuvooq, ila ilaasunut sanilliullugu politiip ataatsip nakkutiginiagassai amerlavallaqaat.

Aammaluunniimmi aqquataa sinnera angerlamut tassa politeeqannginnamiluunniit ilanngaaserisunilluunniit, taamaammat isumaqarpunga nunatsinnut ikiaroonartumik eqqussuiniarneq ajornanngippallaartoq allanngortinneqartariaqartorlu.

Aappaatut apeqqutiginiarpa Imigassat aalakoornartortallit nunani allani angalareersimalluni nunatsinnut nammineq nassarlugit eqquteqqusaajunnaarnerisa kingorna ilanngaaserisut politiillu nakkutiginninnerat annertunerulersimava?

Pingajuattut apeqqutiginiarpa Ilanngaaserisut ukiut kingulliit marluk ingerlanerini ikaleriarsimappat?

Sisamaattut apeqqutiginiarpara Ikiaroonartulerinermik inatsimmik unioqqutitsisut maannakkut pineqaatissinneqartarneranniit sakkortunerusumik pineqaatissiisoqartalernissaa Naalakkersuisut suliniutiginiarpaat? Isumaqarpunga qanorluunniit mikitigigaluarpat angingingaluarpalluunniit pineqaatissiisarneq sakkortunerusariaqartoq, ikiaroonartumik eqqussineq inerteqqutaalluinnarpoq taamaammat ikiaroonartumik eqqusseriarneq ikiaroonartumilluunniit paarsineq tassaasariaqarpoq pineqaatissiissutaariaqartoq sakkortoq qanorluunniit mikitigigaluarpat.

Inuiaqatigiit ikiaroonartumut anniaataat annikillsittariaqarpagut qassinimmi meerartaqarpugut ikiaroonartoq pissutigalugu meeraanerluttunik, inuiaqatigiittut oqartariaqarpugut naammaqaaq tassa sakkortunerusumik pillartalerniartigit ikiaroonartulerinermik inatsimmik unioqqutitsisut.

Naggataatigullu 2009,2010,2011-ilu ikiaroonartulerinermik inatsimmik unioqqutitsinerit qanoq amerlatigisimappat aningaasallu qanoq amerlatigisut arsaarinnissutigineqarsimappat?

Kissaatigaara apeqquteqaatikka ullut suliffiusut qulit iluanni akineqareersimanissaat.